

2-§. Axborotni yoritib berishning asosiy qoidalari

4. Xususiy kapital tushunchasi O'zbekiston Respublikasining «Buxgalteriya hisobi to'g'risida»gi [Qonuni](#), Moliyaviy hisobotni tayyorlash va taqdim etish uchun [konseptual asos](#) (ro'yxat raqami 475, 1998 yil 14 avgust) va O'zbekiston Respublikasi Buxgalteriya hisobining [milliy standarti](#) (1-son BHMS) «Hisob siyosati va moliyaviy hisobotlar» (ro'yxat raqami 474-son, 1998 yil 14 avgust) da keltirilgan.

5. Xususiy kapital to'g'risidagi hisobotning manzilli qismida hisobot sanasi, xo'jalik yurituvchi sub'yektning nomi, tarmog'i, mulkchilik shakli, tashkiliy-huquqiy shakli va to'liq yuridik manzili, xo'jalik yurituvchi sub'yekt uning egaligida bo'lgan organning nomi, xususiy kapital to'g'risidagi hisobotni tayyorlash vaqtida foydalanilgan o'lchov birligi ko'rsatilishi lozim.

6. Hisobotda xususiy kapital va uning tarkibiy qismlari to'g'risida, ustav kapitali, qo'shilgan kapital, rezerv kapital, taqsimlanmagan foyda (qoplanmagan zarar), sotib olingan xususiy aksiyalar va boshqa xususiy kapital elementlari to'g'risidagi axborot yoritib berilishi lozim.

7. Xususiy kapital to'g'risidagi hisobot xususiy kapital to'g'risidagi hisobot davri boshiga va oxiriga bo'lgan tegishli axborotni yoritib berishi kerak.

8. Hisobotda hisobot davridagi xususiy kapital tarkibida bo'lgan o'zgarishlar haqidagi axborot yoritib berilgan bo'lishi kerak. Buning uchun quyidagilar to'g'risidagi axborotlarni yoritib berish kerak: qimmatli qog'ozlar emissiyasi, uzoq muddatli aktivlarning qayta baholanishi, ustav kapitalini shakllantirishdagi valyuta

kursidagi farqlar, rezerv kapitalga ajratmalar, joriy yilning taqsimlanmagan foydasi (zarari), tekinga olingan mol-mulk, pul dividendlari va aksiyalar ko'rinishida to'lanadigan dividendlar, shuningdek, xususiy kapitalni shakllantirishning boshqa manbalari.

9. Xususiy kapital to'g'risidagi hisobotda quyidagilar to'g'risidagi axborot ham yoritib berilishi kerak: chiqarilgan aksiyalar soni, aksiyalarning nominal qiymati, muomaladagi aksiyalar soni.

10. Ikki hisobot davri o'rtasida xususiy kapital tarkibidagi o'zgarishlar moliyaviy hisobotlarda qabul qilingan va yoritib beriladigan baholashning aniq prinsipidan kelib chiqqan holda hisobot davri davomidagi sof aktivlarning ko'payishi yoki kamayishini aks ettiradi.

Mazkur standartda sof aktivlar deganda xo'jalik yurituvchi sub'yektning o'z mablag'lari bilan ta'minlangan uzoq muddatli va joriy aktivlarning qiymati, ya'ni xo'jalik yurituvchi sub'yektning qarz majburiyatlaridan ozod bo'lgan mol-mulk qiymati tushuniladi.